

Contract da fusiun

denter las pleivs evangelicas reformadas da

Castrisch/Riein/Sevgein

Duin

Ilanz/Glion

Luven

Pitasch

Waltensburg/Vuorz

Art. 1 Associaziun dallas sis pleivs

Las pleivs evangelicas reformadas Castrisch/Riein/Sevgein, Duin, Glion, Luven, Pitasch e Vuorz s'uneschon alla Pleiv Foppa.

La Pleiv evangelica reformada Foppa ei in member dalla Baselfgia evangelica reformada dil Grischun e fa part alla Regiun ecclesiastica Surselva. Ella include il territori dallas vischnauncas politicas

Ilanz/Glion (senza Schnaus),

Lumnezia,

Val S. Pieder,

Breil/Brigels (mo Waltensburg/Vuorz ed Andiast),

Schluein.

Art 2 Successiun universal

La Pleiv evangelica reformada Foppa surpren tuttas relaziuns da dretg dallas pleivs d'entochen ussa. Ella surpren tuttas activas e passivas sco era tuttas pretensiuns, oravontut las taglias.

La Pleiv evangelica reformada Foppa ei responsabla per las obligaziuns dallas sis pleivs fusiunadas cun tut lur facultad.

Il gi ch'il contract da fusiun va en vigur surpren la Pleiv evangelica reformada Foppa da principi tut ils contracts da plazzas dil dretg public existents dallas sis pleivs d'entochen ussa. Ella surpren ils engaschaments dallas plevonessas e dils plevons che las pleivs han elegiu sco era ulteriuras emploiadas ed emploiai cun lur pensums existents.

Il gi che la fusiun dalla nova Pleiv evangelica reformada Foppa entra en vigur vegn il regulativ dalla cuminonza da pastoraziun Luven, Flond, Duin e Pitasch abolius. La visada alla Pleiv Flond succeda communablamein dallas pleivs d'entochen ussa Luven, Duin e Pitasch. La Pleiv evangelica reformada Foppa ei aviarta da fixar culla Pleiv Flond in contract da pastoraziun.

Il regulativ dalla cuminonza da pastoraziun Waltensburg/Vuorz e Castrisch/Riein/Sevgein vegn abolius il gi che la fusiun dalla nova Pleiv evangelica reformada Foppa entra en vigur damai che omisduas pleivs fan part dalla pleiv nova Pleiv evangelica reformada Foppa.

Art. 3 Autoritad dalla pleiv

La perioda d'uffeci dils organs elegi dallas pleivs d'entochen ussa e dalla cuminonza da pastoraiziun finescha cull'entrada en uffeci dils organs elegi da niev il gi ch'igl uorden da pleiv entra en vigur. Tochen quei termin mantegnan ils organs la cumpleina cumpetenzza enteifer lur pleivs d'entochen ussa.

Ei restan reservadas las disposiziuns transitoricas da quest contract en art. 5, lit. c, d ed e.

Art. 4 Entrada en vigur, realisaziun

a) Approbaziun dil contract da fusiun

Las personas cul dretg da votar dallas pleivs d'entochen ussa voteschan en radunonzas da pleiv separadas denter ils 17 ed ils 30 d'uost 2026 davart il contract da fusiun present. Il contract da fusiun, il messadi ed il sboz digl uorden da pleiv dalla nova Pleiv evangelica reformada Foppa ein aschuntai agl invit a questa radunonza.

Il contract da fusiun present entra en vigur igl 1. da schaner 2027 sche tuttas sis pleivs approbeschan el. Vegn il contract da fusiun buca approbaus da tuttas sis pleivs ein las pleivs ch'eiin promptas da fusiunar obligadas da presentar enteifer sis meins in niev contract. Vegn quel buca approbaus, vala la fusiun sco refusada.

b) Preparativas per la realisaziun

La gruppa da project vegn incaricada da realisar il contract present. Ella procura per in'informaziun commensurada dils commembers dallas pleivs e prepara la documentaziun necessaria per l'emprema radunonza da pleiv (radunonza da fundaziun).

c) Radunonza da fundaziun

Avon ch'il contract da fusiun entri en vigur envida la gruppa da project alla radunonza da fundaziun. A caschun da quella vegnan elegi il presidi, ils commembers da suprastanza ed ils commembers dil revisurat dalla Pleiv evangelica reformada Foppa per ina perioda d'uffeci da dus onns. Ulteriuras tractandas ein:

- discussiun ed approbaziun digl uorden da pleiv e dalla lescha davart las taglias da baselgia
- discussiun ed approbaziun dil preventiv e dil pei da taglia digl onn 2027.

Art. 5 Disposiziuns transitoricas

a) Uffecis da pervenda d'entochen ussa

Ils uffecis da pervenda restan tier la fusiun pil mument vinavon. En entelgientscha cullas pleivonessas e culs plevons examinescha la suprastanza dalla pleiv ils emprems dus onns suenter la fusiun sche e co ins savess adattar ed organisar quels. La radunonza da pleiv ha la cumpetenzza da prender la decisiun defintiva appartenent l'organisaziun dils uffecis da pervenda.

b) Secretariat dalla pleiv

Il secretariat dalla pleiv surpren pass per pass las incumbensas administrativas dils uffecis da pervenda aschiprest ch'el ei prompts da far quei.

c) Quen 2026, novas obligaziuns ed expensas dallas pleivs d'entochen ussa

Il quen current da mintga pleiv d'entochen ussa siara mintga autoritad corrispundenta giu culla fin digl onn 2026 cun schar controllar el da siu revisurat. Lez dat giu siu rapport per mauns dalla radunonza generala dalla Pleiv evangelica reformada Foppa.

Ils quens annuals dallas pleivs anteriuras vegnan approvai a caschun dalla radunonza ordinaria dalla nova Pleiv evangelica reformada Foppa.

Las pleivs anteriuras astgan far novas obligaziuns e vendas d'immobiglias e schischom mo aschinavon che quellas ein budgetadas il mument dil termin dil contract ni sch'ellas ein urgentamein necessarias.

d) Representanzas en gremis ecclesiastics

Delegadas e delegai d'entochen ussa ella Regiun ecclesiastica Surselva ed el Cussegl grond evangelic restan en uffeci tochen la fin dalla perioda d'uffeci currenta.

e) Sustegn dils gremis novs dalla Pleiv evangelica reformada Foppa

Durant il temps transitoric restan ils commembers dallas suprastonzas anteriuras ed ils commembers dalla gruppa da project a disposiziun alla suprastonza nova ed allas cumissiuns regiunalas e localas cun cussegl e tenor basegns.

f) Approbaziun dallas pleivs d'entochen ussa

Approbau dallas radunonzas dallas pleivs evangelicas reformadas:

(datum dalla radunonza e suttascripziuns dils presidis e dils actuars)

Castrisch/Riein/Sevgein

Duin

Ilanz/Glion

Luven

Pitasch

Waltensburg/Vuorz

g) Approbaziun dil Cussegl grond evangelic

La fusiun entra en vigur igl 1. da schaner 2027 culla resalva ch'il Cussegl grond evangelic approbeschi ella.

Approbau dil Cussegl grond evangelic ils **xx.xx.xxxx**

la presidenta / il president

l'actuara / gl'actuar
